

開放文學 – 歷代筆記 – 夷堅丁志 卷第二十

郎岩妻 臨川畫工黃生·旅遊如廣昌·至秩巴寨·卒長郎岩館之·中夕·一婦人出燈下·頗可悅·乘醉挑之·欣然相就·詢其誰家人·曰·主家婦也·自是每夕至·黃或窘索·必竊資給之·留連半年·漸奄奄病悴·岩問之·不肯言·初岩嘗與倡匿·妻不勝忿妒·自經死於房·雖葬·猶數為影響·虛其室·莫敢居·而黃居之·岩意其鬼也·告之故·始以實言·岩向空中唾罵之·徙黃出寓旅舍·是夕復來·黃方謀畏避·婦曰·無用避我·我豈忍害子·子雖遁我亦來·黃不得已·留與宿·益久·黃終慮其害己·馳還鄉·中途憩泊·納涼桑下·婦又至·曰·是賊太無情·相與好合許時·無一分顧戀意·忍棄我邪·宜速反·黃不敢答·但冥心禱天地·默誦經·婦忽長吁曰·此我過也·初不合迷謬·至逢今日·沒前程畜產·何足慕·我獨不能別擇偶乎·遂去·其怪始絕·黃資深

黃資深秀才·廣昌人·館於鄉里王氏·去主家百步許·有婦人自言主家女來與亂·既久·遂病瘵·主人疑焉·子弟於薄暮見牡狗銜酒器·人立而扣館門·匿跡窺之·黃啟戶延入·俄聞飲食語笑聲·亦未敢呼問·明日·密詢之·諱拒甚力·是日且晚·狗趨屋後山間·久不返·子弟隨觀其所為·乃入破塚中·戴觸體而出·急逐之·棄而走·追擊以杖·殺而曳歸·剖其腹似有孕·一物如皮球·膜裡皆精液·疑結如乳·即煮熟之·加鹽醃·托為野物以啖黃·婦人遂不至·黃他日始知其詳·大驚愧·然所患瘵疾亦愈·廣昌黃襄說

蛇妖

蛇最能為妖·化形魅人·傳記多載·亦有真形親與婦女交會者·南城縣東五十里大竹村·建炎間·民家少婦因歸寧·行兩山間·聞林中有聲·回顧·見大蛇在後·婦驚走·蛇昂首張口·疾迫及·繞而淫之·婦宛轉不得脫·叫呼求救·見者奔告其家·鄰里皆來赴·莫能措手·盡夜至旦乃去·又壕口寶慈觀側田家胡氏婦·年少白晰·春月餉田·去家數里·負擔行山麓·過叢薄中·蛇追之·婦棄擔走·未百步·驚顛而僕·為所及·以身匝繞·舉尾褰裳·其捷如手·裳皆破裂·淫接甚久·其夫訝餉不至·歸就食·至則見之·憤恚不知所出·呼數十人持杖來救·蛇對眾舉首怒目·呀口吐氣·蓬勃如煙·眾股栗莫敢前·但熟視遠伺而已·數日乃去·婦困臥不能起·形腫腹脹·津沫狼藉·昇歸下五色汁鬥餘·病逾年色如蠟·宜黃縣富家居近山·女刺繡開牕·每見一蛇相顧·咽間有聲鳴其傍·伺左右無人·疾走入室·徑就女為淫·時時以吻接女口·又引首搭肩上·如並頭狀·女啼呼宛轉不忍聞·家人環視·欲殺蛇·恐並及女·交訖乃去·遂妊娠·十月產蜿蜒數十·南豐縣葉落坑紹興丁丑歲·董氏婦夏日浴溪中·遇黑衣男子與野合·又同歸舍·坐臥房內·家人但見長黑蛇·亦不敢殺·七日而後去·婦蓋不知為異物也·此四女婦皆存·士人傳合寶慈道士黃師肇說

二狗怪

臨川縣曹舍村吳氏女·未嫁而孕·父母責之·女雲·每夕黃昏後·有黃衣人逾牆推戶入·強我與交·因遂感孕·家人密伺之·果如女言·將入·迎椿以刃·即死·取火照視·乃鄰家老黃狗也·以藥去其胎·得異雛焉·南城竹油村田家嘗失少婦·尋捕無跡·半月而後歸·雲·為烏衣官人迎入山·處大屋下·飲宴相歡·不知何人也·自是常常去之·或至旬日·家人以為山鬼·率鄰里壯男子·深入探逐·正見大石穴如屋·黑狗抱婦酣寢·不虞人至·無復能化形·遂擊殺之·以婦歸·

紅葉入懷

撫州金溪士人藍獻卿妻·頗有姿貌·與夫婦寧母家·肩輿行·涂中風雨暴作·空中飄紅葉·冉冉入懷·鮮紅可愛·撫玩不捨·至夜·恍惚間有人登床與接·及明告其夫·俄得狂疾·言語錯亂·被發裸跣不可制·藍大以為撓·暨巫無所施其伎·了不知何物為妖也·朱極說

楊氏灶神

南城楊氏家頗富·長子不肖·父逐之·天寒無所向·入所貯牛屋中·藉草而寢·霜重月明·寒不得寐·忽一虎躍而來·翼從數鬼·皆佞也·直趨屋所·取草鼓舞為戲·子不敢喘·俄黑雲勁風·咫尺翳暝·虎若被物逐·倉黃走·眾佞亦散·既神人傳呼而至·命喚土地神·老叟出拜·神人責之曰·汝受楊氏祭祀有年矣·公縱虎為暴·郎君幾為所食·致煩吾出神兵驅之·汝可謂不職矣·吾乃其家灶君司命也·汝識乎·土地謝罪而退·明日起視·外有虎跡·草皆散擲地上·後其父怒解·子得歸·具言之·由是事灶益謹·縣士羅大臨說

姚師文

姚師文·南城人·建炎初登第·得宜春尉以死·家之田園·先以歲饑速售·產去而稅存·妻弱子幼·莫知買者主名·閱十餘年·負官物至多·邑令李鼎治逋峻·係姚子於獄累月·會歲盡·鼎憐其實窮·使召保任·立期暫歸·子至家·除夜無以享·獨持飯一器祀其父·告以久囚不能輸稅之故·哀號不已·屋上忽有人呼小名·驚視之·父衣衣服立·索紙墨筆硯·子欲梯而上·止之曰·幽明異途·不宜相近·第置四物簾間可也·子退·忍淚屏息遙望之·姚稍步及簾坐·就膝書滿紙擲下·俯拾之際·父遂不見·新歲持死父書至邑·邑宰讀所書·某田歸某家·稅當若干·逮捕人至·皆駭異承伏·子乃得免·子婦之父董在臨川·素相善·亦往訪之·空中揖語·相勞如平生·且請具酒席·□而不見形·董曰·以何禮為席·曰·與生人等耳·董如言·相對盡敬·不敢少慢·又語及教子·為出論題·說題意主張有條理·罷酒·始辭去·仍囑善護其子·自此寂然·(原闕十二行)

徐以清缺

內文缺

朱承議

南豐朱氏之祖軾·字器之·就館於村墅·嘗告歸邑居·中道如廁·見一農夫自縊·而氣未絕·急呼傍近人·共救解之·既得活·詢其故·曰·負租坐係負不能輸·雖幸責任給限·竟無以自脫·至於就死·豈他所欲哉·問所負幾何·曰·得數千錢便了·特無所從出·朱隨身實挾·謹有此數·悉與之·不告姓名而行·歲夕無以祭神·亦不悔也·後以累舉恩·至承議郎·生五子·京至國子司業·彥終待制·襄為郎官·襄至郡守·皆知名當世·朱公清健康寧·及見諸子達官·享甘旨·年八十有餘乃卒·裡中人至今能言之·

巴山蛇

崇仁縣農家子婦頗少艾·因往屋後暴衣不還·求之鄰里·及其父母家·皆不見·遂詣縣告·縣為下裡正·揭賞搜捕·閱半月弗得·其家在巴山下十里·山絕高峻·樵者負薪掃·至半嶺·望絕壁巖崖間若皂衣人擁抱婦人坐者疑此是也·置薪於地·尋磴道攀援而上稍近·兩人俱入穴中·穴深不可測·樵歸報厥夫·意為惡子竊負而逃者·時日已夕·不克往·至明·家人率樵至其處·偵視莫敢入·或云·穴深且暗·非人能處·殆妖魅所為·宜委諸巫覡·聞樂安詹生·素善術·亟招致之·詹被發銜刀·禹步作法·先擲布巾入·須臾青氣一道如煙·吹巾出·又脫冠服擲下·亦為氣所卻·詹不得已·俛身持刀·躍而下·穴廣袤如數間屋·盤石如床·婦人仰臥·大蛇纏其身·奮起欲鬥·詹揮刀排墮床下·挾婦人相繼躍出·婦色黃如樞·瞑目垂死·詹為毒氣熏觸·困臥久乃蘇·含水噴婦·婦即活·歸之明日·始能言·雲·初暴衣時·為皂袍人隔籬相誘·不覺與俱行·亦不知登山履危·但在高堂華屋內·與共寢處·饑則不物如錫與我食·食已即飽·心常迷蒙·殊不悟其為異類也·鄉人共請詹盡蛇命·詹曰·吾只能禁使勿出·不能殺也·乃施符穴口鎮之·自是亦絕·

興國道人

劉大夫子昂·為贛州興國宰·一子年十七八歲·嘗出書館中·見醉人酣寢於階下·令掖出·則常日在市貨藥道人也·明日復然·疑其異人·命扶入齋舍·揖使坐·焚香作禮·道人曰·郎年少·拜我何為·且何所求也·劉曰·某觀先生必非尋常人·願求秘術爾·道人笑探布囊·取文字三卷·緘其二·皆長二寸許·僅如指大·堅緊若木石·悉以授之·戒曰·謹守護·勿遺失·勿泄於人·先取不封一卷敬行之·餘以次啟視·書盡則事成矣·叮嚀反覆·乃去·劉大喜·退發其書·皆符篆咒術也·依法稍行之·無不立驗·咒一棗置水缸中·試飲病者·無新故癘篤輒愈·請水者雲集·父聞之·大以為憂·詢小吏得其實·索書欲觀·子不敢隱·取以示·即命焚之·火畢·室有聲如雷·少頃神將數輩·如世所繪六丁力士者·涕泣辭訣·謂子昂曰·明府誤矣·賢子當積功行而得道·今乃如此·何不祥甚邪·豈惟不得道·將致禍·某年受大難·不可禳也·言訖·隱不見·及期·子果死·

陳磨鏡

衡州陳道人·以磨鏡為業·中年忽盲·但日憑妻肩·行於市·嘗到衡山·覺有拊其背·曰·陳翁明旦出郭相尋·無失約·明將往·妻止之·曰·蠻寇方擾·安撫李尚書·以重賞募級·或有殺平人以應令·汝設遭此·奈何·遂已·明日·復遇之·約如初·且責其失信·陳語其故·曰·明日但出·無害也·乃如之·至則一道人·攜陳手行官道上·詣粉牆後·附耳語·俄傾別去·不知所言何事也·自是陳不復出·獨令妻自行磨鏡以取給·而閉戶端坐·過百日·雙目了然·復明·顏色潤澤如少年時·頗能談人未來事·至今猶往來湖湘間·右二事餘翼說

烏山媼

新建烏山村·幹道辛卯歲·邑境饑疫·有田家十餘口盡死·唯老嫗與小孫在·未幾·嫗亦死·孫力疾出·哀祈鄰里·丐掩葬·皆畏病染·不肯往·越五日·嫗手足微動·俄體暖目開·遂復活·孫掖起坐·問之·曰·數日何所往·若外人肯相助·則入土矣·幸而不至·豈非天乎·嫗曰·我了不覺知·但見人喚我去·仍擔我破籠·隨行到橋邊·一人自橋而下·令留住行李·使行橋上·顧來者紛紛·在泥在水·舉足如陷·不暇問·前詣官府·朱扉洞開·門內朱紫衣冠·緇黃男女·被驅逐甚眾·路逢縣中舊識吏·問是何處·吏曰·非汝所知·汝不合來·此皆是劫會中人·五百年當一小劫·吾掌綾絹紙三等簿·紙簿勾已盡·絹簿亦勾半·汝係簿內人·然未當至·宜急回·使人引出復過橋·守者舉手加額曰·還爾籠·爾有善心·脫此劫會·吾為爾喜·今速歸救爾屋宅·遂失腳墮橋下·乃蘇·齊微說

陳巫女

南城士人於仲德·為子斲納歸陳氏·陳世為巫·女在家時·嘗許以事神·既嫁·神日日來惑蠱之·每至·必一犬踔躍前導·陳則盛飾入室以須·眾皆見犬不見人·逾時始去·於氏以為撓·召道士奏章告天·陳稍蘇·自言比苦心志罔罔·不憶人事·唯覺在朱門洞戶宮室之中·服飾供帳·華麗煥好·一美男子如貴人·相與燕處·如是甚久·其母忽怒·呼謂子曰·不合留婦人於此·今上天有命·汝將奈何·蓋以平日所積錢·為自脫計·子亦甚懼·遽雲急遣歸·自爾復常·於氏父子計以婦本巫家·故為神所擾·不若及其無恙時·善遣之·遂令歸父母家·竟復使為巫·王三錫說

雪中鬼跡